

# JA' LI SCHIBAL SCARTA PABLO LI LA STS'IBABE LI BUCH'UTIC YICH'OJIC TA MUC' LI CAJVALTIC LI TE TA TESALONICAE

---

**1** Jo'on Pabloun, schi'uc li Silase, schi'uc li Timoteoe, chajc'oponcucic batel ta carta, jo'oxuc li avich'ojic ta muc' li Cajvaltuc li te ta Tesalónicae. Yu'un co'ol oyutuc xa ta sc'ob li Jtotic Diose schi'uc li Cajvaltuc Jesucristoe. <sup>2</sup>Ac'o yac'boxuc slequilal yutsilal li Jtotic Diose schi'uc li Cajvaltuc Jesucristoe. Ac'o spasboxuc ta jun avo'onuc li jujunoxuque.

**Ja' sc'oplal ti ta x'ac'bat yich'ic  
vocol yu'un Dios li jpsmuliletic  
li c'alal ta xcha'tal li Cajvaltuc**

<sup>3</sup>Ja' sc'an ta xcalbecucic coliyal Dios ta sventa ti lec ach'unojic ti chascoltaic li Cajvaltuc, schi'uc ti más chac'uxubinan abaique. Ja' sc'an ti jech ta xcalbecucic scotol c'ac'ale yu'un Dios ta spas scotol. <sup>4</sup>Ta sventa ti jech avo'onuc, ja' yu'un xijmuybajcucic no'ox ta xcalbecucic scotolic li buch'utuc yich'ojic ta muc' li Cajvaltuc li butic ta stsob sbaique. Ta xcalbecucic ti jun avo'onuc ach'unojic ti

chascoltaic li Cajvaltuc, schi'uc ti hcuch avu'unic scotol li vocole schi'uc li contrainele. <sup>5</sup>Ta sventa ti hcuch avu'unic vocole, jech xu' cha'ochic li yo' bu ta spas mantal li Diose. Ja' ta xvinaj o ti tuc' ta xich' c'op li Diose. Yu'un ja' ta sventa ti chapasic li c'usi tsc'an li Diose ti chavich'ic vocole.

<sup>6</sup>Ti tuc' ta xich' c'op li Diose, jech ta ono'ox xac'be yich'ic vocol li buch'utuc chac' avich'ic vocol li avie. <sup>7</sup>Li jo'oxuque chavich'ic vocol li avie, pero ta ono'ox xlaj o li jvocoltic jcotoltic li c'alal chyal tael ta vinajel li Cajvaltuc Jesucristoe. Ta schi'in tael li yaj'angeltac li ech'em stsatsaluc. Schi'uc xa xojobal chyal tael jech chac' c'u cha'al li bu toj ech'em chtil c'oq'ue. <sup>8</sup>Ja' chtal yac'anbe yich'ic vocol li buch'utuc mu xich'ic ta muc' li Diose, ja' li buch'utuc mu sc'an sch'unic ti ja' no'ox chijcolutic ta sventa li Cajvaltuc. <sup>9-10</sup>Li vocol ti chich'ique ja' ti ta xch'ayic o sbatel osile. Ja' yu'un mu xba sq'uelbeic

o sat li Cajvaltique schi'uc li slequial yutsilale. C'alal ta xtale, ta xquich'tic ta muc' jcotoltic, jo'otic ti tuq'uibtasbilutic xa yu'une. Mu xa c'u jech o li co'ontique yu'un toj lec ta xquiltic. Ja' no'ox jech chavilic e'uc yu'un la ach'unic li c'alal laj calboxuc li sc'op Diose.

<sup>11</sup>Ja' yu'un scotol c'ac'al ta jtacutic ta na'el li Dios cu'untique ti ac'o lec chayilic, jo'oxuc ti laj xa yic'oxuque, ta sventa ti más chapasic li c'ustic leque, schi'uc ti más chach'unic ti chascoltaic ta spasele. Ja' yu'un ta j'anbecutic ti ac'o c'otuc ta pasel avu'unique. <sup>12</sup>Jech lec chbat sc'oplal avu'unic li Cajvaltique Jesucristoe. Schi'uc lec chbat ac'oplal e'uc ta sventa ti ta slequil yo'on chascoltaic li Dios cu'untique schi'uc li Cajvaltique Jesucristoe.

**Ja' sc'oplal ti chc'ot sc'ac'alil  
ta xlic jun vinic ti ja' yabtel  
o ta scontrain li Diose**

**2** <sup>1-2</sup>Li jo'otic li quich'o'jtic ta muc' li Cajvaltique, jna'o'jtic ti chc'ot sc'ac'alil ti chtal stsobutic li Cajvaltique Jesucristoe ti chba jchi'intic o sbatel osile. Ja' yu'un chacalbeic ti mu me xach'unic lo'loel yu'un li buch'utic ta xalic ti laj calcutic ti ic'ot xa sc'ac'alil ti ta xcha'tal li Cajvaltique. Ac'o mi oy buch'u ta xalic ti jo'oncutic jech laj calcutique, ti jech laj yalbuncutic Dios ti yalojique, mu me xach'unic. Ac'o mi chalic ti jech la jtaccutic ta alele, mi chalic ti jech la jts'ibacutic batel ta cartae, mu me xach'unic. Mu me xaxi'ic yu'un mu meleluc. <sup>3</sup>Q'uelo me abaic, mu

me xach'unic lo'loel yu'un muc to bu chtal li Cajvaltique. Yu'un chc'ot sc'ac'alil ti ep chlj chibajuc yo'onic li buch'utic yich'o'jic ta muc' li Cajvaltique. Chlic scontrainic li Diose. Ts'acal to ta xlic li jun vinic ti ja' yabtel ta scontrain li Diose, ja' li sc'oplal ti ta xch'ay o sbatel osile. Mi ic'ot xa ta pasel jech taje, ja' o ta xtal li Cajvaltique. <sup>4</sup>Li vinic chcale chopol ta xil mi quich'o'jtic ta muc' li Diose, mi santoetic c'uxi, yu'un ja' tsc'an ich'el ta muc' stuc. Ch-och chotluc li ta smuc'ta ch'ulna Dios li te ta Jerusaleme ti ja' tsp'is sba ta Dios stuque.

<sup>5</sup>Na'ic me ti jech ono'ox laj calboxuc li c'alal te to'ox jchi'ucoxuque. <sup>6</sup>Li jo'oxuque xana'ic buch'u spajeso'j to ti jech muc to bu chlic ta ora li vinic li chcale. Ja' to mi ic'ot sc'ac'alile, ja' to chlic. <sup>7-8</sup>Li avie mu xquiltic li c'u sba ta x'abtej li pucuje ti ta socanbe yo'on li crixchanoetique. Ja' to mi iloc' batel li buch'u chpajesvane, ja' to ta xvina'j li vinic ti ja' yabtel o ta scontrain li Diose. Pero ta jvuch'tael no'ox ta xmile yu'un li Cajvaltique li c'alal ta xcha'tal schi'uc li xojobale, jech ta x'aj o. <sup>9</sup>Li c'alal ta xlic li chopol vinic chcale, ja' ta smantal li banquial pucuj ti chlique. Ta sju'el no'ox banquial pucuj ta x'abtej. Scotol xu' yu'un ta spas mi itale. Chac' ta ilel stsatsal sju'el pero yu'un no'ox ta xlo'lovan. <sup>10</sup>Ta scoj ti ep li c'ustic ta spase, ja' ta xlo'loatic o li crixchanoetic li buch'utic ta xch'ayic ono'ox sbatel osile. Ti ta xch'ayic o sbatel osile, yu'un mu sc'an sch'unic li sc'op Dios ti ja' melele, ti ja' ta

xcolic oe. <sup>11</sup>Li Diöse ta xac' ti ac'o lo'loaticuque ta scoj ti mu ono'ox sc'an sch'unique, ja' ta sch'unic o li c'usi mu meleluque. <sup>12</sup>Jech ch'ot yich'ic ich'beel sc'opic yu'un muc bu sch'unic li sc'op Dios ti ja' melele. Yu'un ja' lec iya'lic ta spasel li c'ustic chopole.

**Ja' sc'oplal ti "t'ujbiloxuc ono'ox yu'un Dios sventa chacolic o sbatel osil", xi li Pabloe**

<sup>13</sup>Li jo'oxuc li co'ol quich'ojtíc ta muc' li Cajvaltique, c'uxoxuc ta yo'on li Cajvaltique. Ja' yu'un scotol c'ac'al sc'an ta xcalbecutic coliyal Dios ta sventa ti t'ujbiloxuc ono'ox yu'un Dios sventa chacolic ti c'alal mu'yuc to'ox li vinajel balumile. Yu'un ituq'uib xa avo'onic ta sventa li Ch'ul Espíritue, schi'uc ta sventa ti la ach'unic li sc'op Dios ti ja' melele, ja' chacolic o sbatel osil. <sup>14</sup>Ja' yu'un laj yic'oxuc li Diöse li c'alal laj calboxuc ti ja' no'ox chijcolutic ta sventa li Cajvaltique, ja' ti yo' xaco'olajic achi'uquic li Cajvaltíc Jesucristoe.

<sup>15</sup>Ja' yu'un li jo'oxuc li co'ol quich'ojtíc ta muc' li Cajvaltique, staojuc no'ox me yav avo'onic ta stojol li Cajvaltique. Mu me xach'ay ta avo'onic li c'usi la jchanubtasotcutic oe, schi'uc li c'usi laj calboxuc ta jcartacutique. <sup>16</sup>Li Cajvaltíc Jesucristoe schi'uc li Jtotic Diöse toj ep slequil yo'on ta jtojoltic. Spatojbutic co'ontic yu'un yac'oj jna'tic ti chijcolutic o sbatel osile. <sup>17</sup>Ja' yu'un ta jc'anbecutic ti ac'o spatboxuc avo'onic, schi'uc ac'o stsatsubtasboxuc avo'onic, yo' ac'o lec chac'opojic schi'uc ac'o lecuc scotol li c'ustic chapasique.

**Ja' sc'oplal ti laj yal Pablo ti ac'o c'oponbatuc Dios ta stojole**

**3** Ja' xa no'ox chacalbeic ti ac'o xac'oponbuncutic Dios ta jtojolcutic yo' ac'o sch'unic ta ora li buch'utic ta xcalbecutic li sc'op Diöse, ti ac'o yich'ic ta muc' jech chac c'u cha'al la avich'ic ta muc' li jo'oxuque. <sup>2</sup>C'oponic Dios nojtoc ta sventa ti mu me xispajescutic li buch'utic chopol yo'onic ti mu sc'anic ti ta xcalcutic li sc'op Diöse. Yu'un mu scotoluc crichanoetic ta sch'unic ti ja' no'ox Jcoltavanej li Cajvaltique. <sup>3</sup>Li Cajvaltique chiscoltautic yu'un jech ono'ox yaloj. Ta ono'ox xac' stsatsal avo'onic. Ta ono'ox xaschabiic ti mu xaspasic ta canal li pucuje. <sup>4</sup>Jna'ojcutic ti yacaloxuc ta spasel li c'ustic laj calcutic comele yu'un ja' chascoltaic li Cajvaltique. Jna'ojcutic nojtoc ti chach'unic li c'ustic yan chacalbeique. <sup>5</sup>Ta jc'anbecutic li Cajvaltique ti mu me xach'ay ta avo'onic ti c'uxoxuc ta yo'on li Diöse, yo' jech chcuch avu'unic scotol li vocole jech chac c'u cha'al icuch yu'un li Cristoe.

**Ja' sc'oplal ti persa ta jpas cabtelitque**

<sup>6</sup>Li jo'oxuc li co'ol quich'ojtíc ta muc' li Cajvaltique, chacalbeic mantal ta sventa li Cajvaltique. Li buch'u yich'oj ta muc' li Cajvaltique ti ch'aj ta abtele, mu me xachi'inic, mu me xac'uxubinic. Yu'un mu sch'un li mantal li laj calboxuc ti sc'an ti ac'o xa'abtejiqúe. <sup>7</sup>Yu'un xana'ic li c'u sba la jpascutic li c'alal te to'ox jchi'ucoxuque.

Avilic ti lij'abtejcutique. Avilic ti muc bu ch'ajuncutic ta abtele. Sc'an ti ja' chachanique. <sup>8</sup>Mu ta matanaluc la jc'anboxuc li jve'elcutique, la jtojcutic. C'ac'al ac'ubal tsots lij'abtejcutic yo' c'uxi mu xcac'cutic avocolic ta sventa li jve'elcutique. <sup>9</sup>Ac'o mi sc'oplal ti xu' chamac'lanuncutique pero mu jc'ancutic jech. Lij'abtejcutic yo' jech chachanic ti persa sc'an cha'abtejjic e'uc li jo'oxuque. <sup>10</sup>Yu'un c'alal te to'ox jchi'ucoxuque, jech ono'ox laj calboxuc: “Li buch'utic mu sc'an x'abtejqique más lec mu xve'ic”, xijchicutic. <sup>11</sup>Yu'un ca'iojcutic ti oy jayvo' li te achi'uquic ti ch'ajic ta abtele. Ja' no'ox ta stic'ulan sbaic ta lo'il li bu mu sventaicuque. <sup>12</sup>Li buch'utic jech ta spasiqique ta xcalbecutic mantal ta sventa li Cajvaltique Jesucristoe. Ta xcalbecutic ti ac'o abtejicuque yo' jech ta staic o li c'ustic ta xtun yu'unique. <sup>13</sup>Li jo'oxuc li co'ol quich'ojtic ta muc' li Cajvaltique, mu me

xtavan xava'iic ta spasel li c'ustic leque. <sup>14</sup>Mi oy buch'u junucal avu'unic ti mu sch'unic li c'usi laj calboxuc batel li li' ta cartae, q'uelic me li buch'u jech tspase. Mu me xachi'inic yo' ac'o xi'uc, ac'o qu'exavuc. <sup>15</sup>Pero muc bu ta xcalcutic ti ac'o xacontrainique. Ja' lec albeic li c'usi lec ta pasele yu'un ja' co'ol avich'ojic ta muc' li Cajvaltique.

#### Ja' stsutseb scarta li Pabloe

<sup>16</sup>Li Cajvaltique xu' yu'un chispasbutic ta jun co'ontic. Jech ac'o spasboxuc ta jun avo'onic scotol c'ac'al yo' ac'o cuchuc avu'unic scotol li c'ustic ta xtal ta atojolique. Ac'o schabioxuc acotolic li Cajvaltique.

<sup>17</sup>Jo'on li Pabloune chabanucoxuc chacalbeic batel. Chajts'ibabeic ta jc'ob jtuc li jaychol li'i. Ja' jech ta jts'iba ta scotol jcarta yo' jech chvinaj o ti ja' jcarta. <sup>18</sup>Ac'o yac'boxuc slequillal yutsilal li Cajvaltique Jesucristoe.